

過庭錄存

延陵弟子紀畧

曹氏醫書

下

過庭錄存

臣題

過庭錄存

吳郡曹存心仁伯氏著

男文瀾孫

穀豐
奎綬

全校刊

程

安徽

先生之病素稟濕熱又挾陰虛之病也濕者何地
之氣也熱者何天之氣也天地鬱蒸濕熱生焉地
天交泰絪縕生焉生生不息之機妙合於其間稟
而受者濕熱元氣混合一家出自先天牢不可破
較之外感內傷之濕熱屬在後天者一掃而盡豈

可同日語哉。設使薄滋味。遠房幃。不過生瘡動血。幼年所患之等症而已。惟從事膏粱。更多嗜慾。外增濕熱。內耗陰精。則臟腑營衛。常有春夏之情。而無秋冬之氣。無怪乎其亥年之風火相煽耳。苦於鳴。豈非陽氣萬物盛上而躍之一驗乎。當斯時也。靜以養之。則臍冷齒痛。以下見症之外。猶可相安於無事。何乃火上添油。喜功生事。陡然頭昏面赤。一派炎炎之勢。甚至火極似水。陽不成其爲陽。勢不成其爲勢。肝經之火。督脈之陽。亦從而犯上。失

其本來之面目矣。近聞引火歸源以爲甘溫能除大熱。嗟乎未聞道也。甘溫能除大熱者。良以下極陰寒。眞陽上越。引其火歸其源。則坎離交媾。太極自安。若夫陰虛濕熱蒸動而上者。投以清滋。尙難對待。斷不可以火濟火。明犯一誤。不可再誤之戒。然清已有法。滋亦頻投。飲食能增。身體能胖。外有餘矣。而色色不能久立久坐。卽病機中萬物陰陽不定。未有主也之條。際此外盛中空。下虛上實。用藥實難。嘗見東垣之清燥湯。丹溪之虎潛丸。潤燥

合宜。剛柔協濟。張氏每贊此兩方。始克有賴。何樂而不卽用之耶。無如藥力之所以載行者。胃氣也。胃屬陽明。陽明中土。萬物所歸。濕熱竊踞。亦久已薰蒸。傳爲吐血。嗽痰。鼻塞。噫氣。二便失調。正是九竅不和。都屬胃病。欲安內臟。必先清其外腑。又爲第一要著。至於秋末冬初。病甚者。十月坤卦純陰。天已靜矣。而濕熱反爲之動。腎欲藏矣。而濕熱仍爲之露。致邪失正。能不令病之更進一層乎。附方

謹覆

青鹽

四兩

甘草

八兩

葶薺

一斤

海螵

二斤

草薺

一兩

飴糖

八兩

橘葉

五錢

霞天麴

一兩五錢

十大功勞葉

一斤

刺猬皮

一兩五錢

右藥爲末竹瀝和水泛丸每服三錢清晨開水

送下服完後合虛潛丸全科同合常服

汪 杭州

承示病原陽分比陰分更虧顯有明徵陰虧而用十全養營等法責重乎陰寓以陽藥本屬和平之劑良以秋分在即燥氣加臨不敢責重乎陽以燥

就燥反增燥病焉耳。然於膏方下云。後日可加附桂。斟酌用之一語。早已言之。非不見到也。蓋天地之氣。半月一更。人身之氣。亦半月一更。八月而至九月。氣已兩更。病勢不除。飲食反減。明明陰得膏滋而無病。陽得膏滋而更衰。一月之間。陰陽偏勝一膏之內。功過相抵。可歎。補偏救弊。因時制宜。應接不暇也。所言廿七廿九兩日。霜降始寒。寒氣外侵。痰飲內動。動見青黃綠水。尙屬陽明胃府。至於黑色。已自胃底而來。腎虛水泛。脾虛積飲。已見一

斑然神氣困頓。面色青浮。脉見雙弦。以昭陽氣不
充。痰飲內聚宜矣。而反忽然牙齒浮疼。加以口舌
酸澀。呃忒於胃。衝逆於脅。變出一番火氣者。肝火
也。肝氣也。氣火之橫逆。不外腎虛無以涵木。木旺
順乘脾土。此等氣不足。卽是寒之根底。反見氣有
餘。便是火之情狀。所謂本寒標熱是也。夫惟本寒
標熱。豈非陽氣之虛。較之陰氣更進一層耶。此時
論治。離照當空。始可陰霾四散。宗風虛則熾痰寒
則壅之訓。而出一星附散法。以助脾陽。俾虛風寒

痰不相互結非獨分解病情而且土旺用事更合
機宜如一立冬又不可以純陽無陰之品施於久
病陰血本虧之體冬月宜藏之令卽以此方分兩
三分之一日進一服叅入前定膏滋方中只須五
錢清晨服下傍晚再服水泛金匱腎氣丸一錢五
分淡鹽湯送下以占冬至陽生勿藥有喜至於黑
錫丹控涎丹本來合式因病處方隨機應變相時
而動可也須俟尊處高明權之

胡西滙

天之熱氣下。地之濕氣上。人在氣交之中。無隙可避。虛而受者。卽名曰暑。暑之爲言。有濕有熱。不言而喻。夫暑先入心。暑必傷氣。氣分之濕。不爲之先除。則所畱之熱。必不能外出。所以暑濕熱三氣交蒸之先。務須消去其濕。正合古人消暑在消其濕之旨也。然濕邪一去。熱氣卽從外達。又名暑熱。不名暑濕。一氣而有兩名。前後之用藥亦異。蓋以熱則傷陰。氣亦更弱。無怪乎鼻衄舊恙。上從清道而出。身體困倦。飲食漸減。脈轉弦數。陽分更熱。口內

知乾種種見其虛中有實之象焉。但暑邪一症。河間每論三焦。現在頭額昏蒙。邪熱偏於中上。惟衄去過多。虛在下焦。陰液如此。細診斷在少陰不足。陽明有餘。有何疑惑哉。擬景岳玉女煎法。俾得中下焦熱氣上薰於肺者。悉從暗化。而下焦之陰氣亦不再傷。仍不出乎劉氏三焦治例。未識當否。

細生地

煨石膏

懷牛膝

麥冬

肥知母

蕭藩署

人年四十陰氣自半。從古至今未嘗不若是也。惟尊軀之所獨異者。正在濕痰素多。陽事早痿耳。嘗閱醫書。夜臥臂在被外者。每易招寒而痛。露臂枕兒者。亦易受寒而痛。此間之痛。雖非二者可比。而其起痛之因。本於臥在竹榻。竹榻之性。寒涼者也。日日臥之。則寒涼之氣。未有不襲筋骨。較之前二條之偶傷經絡者。更進一層矣。所以陽氣不宣。屈伸不利。痛無虛日。喜熱惡寒。仲景云。一臂不舉。此爲痺。載在中風門中。雖非真中。而却類中之機。豈

容忽視。現在治法。首重補陽。兼養陰血。寓之以驅寒。加之。以化痰。再取經絡通之。則一方制度。自不失。君臣佐使焉。

製川附

黨參

片姜黃

炙草

大熟地

當歸

白芍藥

橘紅

風化硝

桂枝

西羌活

沉香

海桐皮

只殼

野於朮

茯苓

縣黃芪

阿膠

製半夏

虎掌

右爲末。取竹瀝一茶碗。姜汁二調羹。入淡蜜水。

泛丸

朱逢辰次診

松江

左升太過。右降不及。何經之病。曰左屬肝。右屬肺。肺肝同病。自然升降失常。然肺爲五臟華蓋。肝脈布於兩脅。此左升僅屬於肝。右降反屬於肺。何也。蓋肝體在旁。肺體在上。只就位置而言。若論其作用。內經又曰。肝居人左。肺居人右。右之不降。肺正失其清肅之用也。左之過升。肝反多所橫逆之用也。橫逆之邪。加於清肅之所。木寡於畏。反侮於金。

無怪乎身半以左之氣旋之於右。既不能透徹於上。亦不能歸縮於下。有如邪正相爭。盤旋脇部。直至得後。與氣則快然如衰者。木究不能上尅於金。而仍下洩於土也。夫土曰稼穡。作甘者也。木曰曲直。作酸者也。口甘帶酸。痰唾亦然。何莫非土受木乘之過。木亦太剛矣哉。誰能柔之。惟有左金一方。以爲尅木之制。則木正其體。金得其用。何患升降之不得其常耶。

左金丸

覆朱逢辰書

接讀手書。荷蒙錦念。謝謝。所諭氣火益熾等證。卽古語云。氣有餘。便是火。氣從左邊起者。肝火也。左金丸主之。當歸龍薈丸亦主之。今旣左金一丸。如水投石。自宜以當歸龍薈丸繼之。於後未嘗不可爲法。惟我先生有爲癰爲血。不可不預防。一語出自高明。定有灼見。弟始而駭然。繼且茫然。幾不知筆從何處着矣。我先生如飢如渴。以望一方。惟速爲貴。而弟又刻無暇晷。夜以繼日。有者求之。無者